

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

Poštovana braćo i sestre, draga djeco i omladino, esselamu alejkum!

Današnju hutbu započet ćemo s hadisom u kojem Muhammed, s.a.v.s., kaže: **"Kome je draži imetak iz nasljedstva nego vlastiti imetak?" Rekoše: "Allahov Poslaniče, svakome od nas draži je njegov imetak." Reče: "Doista je njegov imetak onaj koji podjeli, a imetak njegovog nasljednika onaj koji ostavi iza sebe."**

Poštovana braćo i sestre, ovaj Poslanikov, s.a.v.s., hadis nas jasno opominje da trebamo dijeliti dok smo još u mogućnosti, jer samo Allah zna da li će naši nasljednici, naša djeca, udijeliti od tog imetka u naše ime i što će uopće s njim uraditi.

Zbog toga braćo i sestre, dok je imetak još u našim rukama položimo ga na ahiretski račun. Dok je imetak još u našim rukama učinimo nešto sa čime ćemo biti ponosni i na Dunjaluku i na Ahiretu.

Allah, dž.š., kaže: **"Allah je od vjernika kupio živote njihove i imetke njihove u zamjenu za**

Džennet koji će im dati." (Et-Tevbe, 111)

Poslanik, s.a.v.s., kaže: ***„Darežljivost je jedno džennetsko drvo, prihvatit će se za jednu njegovu granu, i ta grana ga neće pustiti sve dok ga ne uvede u Džennet. Škrtost je jedno džehennemsko drvo, pa tko bude škrt prihvatit će se za jednu njegovu granu, i ta grana ga neće pustiti sve dok ga ne uvede u Džehennem."***

Braćo i sestre, dijeljenje imetka na Allahovom putu, dijeljenje imetka na putu hajra, na putu dobra, ne „deblja“ samo ahiretski račun, već i ovodunjalučki.

Allah, dž.š., kaže: **"Reci: 'Gospodar moj daje obilnu opskrbu onome kome hoće od robova Svojih, a kome hoće uskraćuje; što god vi udijelite, On će to nadoknaditi, On najbolje opskrbljuje'"** (Es-Sebe', 39)

Braćo i sestre, preneseno je da je u Kuvajtu živio čovjek po imenu Abdullah Al-Mutavva. On je bio veliki dobrotvor, veliki vakif. Mjesečno je dijelio dva miliona dolara na ime sadake po cijelom svijetu. Pred njegovom kancelarijom bi se svako jutro uhvatio red onih koji traže, a on bi svima dao ono što su tražili. Pored dobre duše, i velikog bogatstva koje mu je Allah dao, on je imao još i jedanaest djece. Jedanaesto svoje dijete odlučio

Abdullah poslati na studije ekonomije, u jednu od zapadnih zemalja, kako bi ga ovaj naslijedio u njegovom poslu. Otišao je sin da studira, a Abdullah i dalje dijeli i „šakom i kapom“, ali što više dijeli Allah mu sve više daje. Kada je sin završio studije vratio se i zatekao oca kako i dalje dijeli, sin, ekonomista, mu reče: „Dragi oče ako tako nastaviš, mi ćemo ostati bez para. Bankrotirat ćemo.“ Otac je ostao zaprepašten sinovim riječima, pa ga upita: „Sine, da li si to ti izgubio vjeru u bereket, u nafaku?“ „Ne oče, mene su učili u školi da postoji samo izlaz i ulaz. Rashodi i prihodi.“ Otac mu je onda pokušao objasniti da postoji Allahov bereket. Da samo Allah daje i oduzima. Pokušao mu je objasniti da što više daju, Allah dž.š. im više vraća. Ali sve je to bilo uzaludno, jer sin reče: „Ne oče, postoji samo izlaz i ulaz. Ako želiš da te ja naslijedim u poslu onda nema više dijeljenja.“ Tada Abdullah reče svome sinu: „Dragi sine, koliko jedna ovca može da ojanji mladih?“ „Jedno ili dvoje“-odgovori sin. „A koliko jedna kuja može da oštene?“ „Može troje, četvero, a čuo sam da ljudi govore petero i šestero.“ „Dobro sine“ reče otac, pa nastavi: „Što ljudi na dunjaluku više jedu ovčije ili pseće meso?“ Sin začuđen ovim

pitanjem reče: „Dragi, oče, pa svi jedu ovčije a samo neki pseće meso.“ „Odlično sine“ – reče otac pa nastavi: „Odgovori mi na treće pitanje: „Sine, čega više na dunjaluku ima ovaca ili pasa?“ „Ovaca“ – odgovori sin. Onda otac reče: „E sada moj dragi sine reci mi kako to da više ima ovaca nego pasa, iako ovca ojanji jedno ili dvoje, a kučka troje i više? Kako to da više ima ovaca, nego pasa, iako ovce svi jedu, a pse malo tko? Kako je to moguće? Gdje je tu ulaz izlaz?“ Sin reče: „Dragi oče, ja ti na to pitanje ne znam odgovoriti.“ „E to ti je sine bereket o kojem sam ti govorio. To je taj bereket kojeg je Allah dao u ovci, a ne i u psima.“

To je taj bereket, braćo i sestre, kojeg je Allah dao pa kada upitamo kakvog dobrog i pobožnog starijeg insana koji ima malenu mirovinu: „Kako se živi?“ Kaže: „Elhamdulillah. Ima se dovoljno.“ A kada pitaš nekog poduzetnika ili sličnog isto pitanje, čija su mjesečna primanja neusporedivo veća, on kaže: „Teško je. Nikako kraj sa krajem. Kriza. Kredit....“ Mora biti kriza braćo i sestre kad Allah nije dao bereketa u imetku. Mora biti kriza, kada se imetak troši u haram i rasipa u luksuze. Mora biti kriza kada se

NE DAJE ZEKAT!

I na kraju ove hutbe, poslušajte ovaj Allahov govor: **”O vjernici, neka vas imanja vaša i djeca vaša ne zabave od sjećanja na Allaha. A oni koji to učine, bit će izgubljeni. I od onoga čime vas Mi opskrbljujemo udjeljujte prije nego nekom od vas smrt dođe, pa da onda kaže: ‘Gospodaru moj, da me još samo kratko vrijeme zadržiš, pa da milostinju udjeljujem i da dobar budem!’ Allah sigurno neće ostaviti u životu nikoga kome smrtni čas njegov dođe; a Allah dobro zna ono što vi radite.”** (Munafikun, 9-11)

Uzvišeni Gospodaru, molimo te dovom kojom te mole i tvoji plemeniti melec: „Allahu, podari još više onome tko dijeli. Allahu, podari propast onome tko škrtari!“ Amin!

Prethodne hutbe potražite na našoj stranici: www.medzlis-split.org
Pripremio: Vahid ef. Hadžić na temelju pisanja Enes ef. Habibovića
Split, 23.03.2017.

ISLAMSKA ZAJEDNICA U HRVATSKOJ
MEDŽLIS ISLAMSKE ZAJEDNICE SPLIT



NAŠE JE ONO
ŠTO PODIJELIMO

472